

18. oktobari 2017

**Ajunaarnersuarnik ajunaarnersuartulluunniit ittunik pisoqartillugu  
iliuuseqapallattarnermut upalungaarsimaneup kommuninit  
akisussaaffigineqarnerata pitsaaquaanik pitsaanngequtaanillu UKA2018-imut  
Naalakkersuisut nassuaasiornissamik peqquneqarnissaannut Inatsisartuni  
aalajangiiffisassatut siunnersuut.**

(Inatsisartunut ilaasortaq Bendt B. Kristiansen, Inuit Ataqatigiit)

Siullermik Siumumiit aamma upalungaarsimasut qutsavigerusuppavut, nalunngilarput aasaq manna annertuumik sulianik ingerlataqartut, alianaqisumik Nuugaatsiami ajunaarnersuaqarmat, ilanngullugulu Illorsuarni aamma pisut eqqarsaatigalugit, suliat imaannaangitsut ingerlanneqarput, minnerunngitsumik manna periarfissaq atorlugu oqaatigerusupparput eqqugaasut misiginneqatigingaarpavut.

Nunatsinni pinngortitaq peqqarniissinnaasoq nalunngilarput, taamaammat upalungaarsimaneq pisariaqarluinnarpoq. Upalungaarsimaneq ullumikkut kommunit akisussaaffigisaat Siumumiit tulluartippalput, pitsangorsaajuarnissaq siunertaralugu, naalakkersuisut peqquneqassasut nalunaarusioqqullugit, pitsaaqqutit ajoqutillu ullumikkut aaqqissuussaanermi suut takuneqarsinnaanersut, kiisalu atortutigut inissisimaneq sumiinnersoq aamma paasisaqarfingissallugu pingaartippalput; atortorissaarutit tulluarpaat, nutaaliaanerusunik atortorissaarutinik pissarsinissaq pisariaqarpa? upalungaarsimasut pikkorissartarnerat, sungiusartarnerat minnerunngitsumillu ilinniartarnerat naammaginartutut taaneqarsinnaava?

Nunat allat issittormiut, uagutsituulli inuiaqatigiit ikittunnguit, inoqarfiiit imminnut ungasissut, avinngarusimasut, periuseqarpat ilinniarfigisinnaasatsinnik, nunatsinniluunniit misilitakkat issittormioqatitta ilinniarfigisinnaavaat? Arlaatigut qaninnerusumik suleqatigisinnaavavut nunat Kalaallit Nunaannut sanillersuussinnaasut?

Assersuutigalugu, Nunavummiut, Norgep avannaa, Alaskamiut allallu.

Siumumiit tulluartippalput, sapinngisamik upalungaarsimankut aaqqissuussaanerput pitsaanerpaaffianiitinniarlugu, nalunaarusiamti nalilersuutit ilaaligut qulaani taasagut ilaatinneqassasut.

Taamatut oqaaseqarluta siunnersuut ilalerparput.

Jens-Erik Kirkegaard, Siumut.